

## SUL Y DRINDOD

GENESIS 1:1-2:4A; SALM 8;  
2 CORINTHIAID 13:11-13; MATHEW 28:16-20

---

---

### ● Gweddi agoriadol

Bydded i gariad y Tad,  
tynerwch y Mab  
a phresenoldeb yr Ysbryd  
lonni ein calonnau  
wrth i ni gyfarfod i addoli,  
a dod â heddwch i'n heneidiau  
heddiw a phob dydd.

### ● Moliant

Dduw Greawdwr, gwelwn fflach o'th harddwch  
mewn machlud haul a brig y mynydd.  
Synhwyrwn dy rym yn y daran,  
yn y mellt a rhuthr tonnau.

Arweinydd: Dduw Greawdwr

**Pawb: Molwn di.**

Werthfawr Iesu, gwelwn dy gariad  
yn ymestyn ar led ar groes greulon.  
Syllwn mewn rhyfeddod ar dy aberth,  
cariad wedi'i dywallt dros y ddynoliaeth.

Arweinydd: Werthfawr Iesu

**Pawb: Molwn di.**

Ysbryd Glân, gwelwn dy rym  
mewn bywydau newydd a chalonnau ar dân.  
Gwrandawn am dy lef ddistaw fain,  
yn cysuro, yn arwain, yn galw.

Arweinydd: Ysbryd Glân  
**Pawb: Molwn di.**

● **Cyffes**

Ar adegau ein hamau  
a'n diffyg cred,  
pan fydd pwysau daearol  
neu amgylchiadau  
yn rhoi pellter rhyngom,  
tyrd yn nes, fe erfyniwn.

Atgoffa ni o'r gras  
ddaeth atom ar y dechrau,  
cariad y Tad,  
anadl yr Ysbryd.  
Rho i ni ddewrder,  
ffydd sy'n dal,  
a gwybod yn sicr  
dy fod ti gyda ni  
heddiw a phob amser,  
byth ymhellach  
na sibrwd gweddi.

● **Diolch**

O achos gogoniant y nefoedd uwch ein pennau,  
a mawrhydi y ddaear o'n cwmpas,  
a dirgelion anhygoel y cread,  
sefwn mewn syndod a rhyfeddod  
a chyflwyno ein diolch i ti.

O achos dy gariad sy'n fendith ddyddiol i ni,  
a diogelwch dy freichiau yn ein cofleidio  
a dirgelwch dy ras yn cael ei arllwys trosom,  
sefwn mewn syndod a rhyfeddod  
a chyflwyno ein diolch i ti.